

# «Sbassar ils pretschs n'è nagina soluziun»

Hotelleriesuisse Grischun: Radunanza da delegads

DA GION NUTEGN STGIER / ANR

■ **La critica pauschala cunter ils hoteliers grischuns saja nungiustificada. Tgìrar anc meglier ils giasts e porscher dapli per il pretsch, quai saja indispensabel cun la situaziun actuala da la valuta.** Darar è l'interess per la radunanza da delegads da Hotelleriesuisse Grischun stà uschè grond sco venderdi passà. Il Teater da la citad a Cuir era bunamain occupà, cura che *Ernst Wyrsch*, dapi trais onns president dals hoteliers grischuns, ha beneventà ils 230 preschents da la politica, da l'economia, dal turissem e lura er ils delegads e las delegadas. El saja satisfatg che tantas persunas conferman cun lur preschientscha l'attaschadadad envers ils hoteliers che hajan actualmain tut auter che simpel. Dapi che la Banca Naziunala Svizra haja abolì il curs minimal per l'euro saja er la hotellaria grischuna en in vair dilemma. Mintga terz manaschi saja en ina situaziun criticasche l'euro ed il franc svizzer restian vinavant equilibrads, ha ditg Ernst Wyrsch.

## «Noss giasts èn cuntents»

Ernst Wyrsch ha lura er drizzà clers plets envers las medias ed er envers tut las persunas che crititgeschan ferm la hotellaria grischuna. «Nus n'avain nagins problems cun la qualitad, cun ils pretschs e cunzunt cun la malcurtaschavladad», ha ac-



**Èn da buna speranza per la hotellaria grischuna, malgrà la situaziun da la valuta: Ernst Wyrsch, president da Hotelleriesuisse Grischun, Jon Domenic Parolini, cusseglier guvernativ e Jürg Domenig, mainagestiun da l'associaziun che reunescha ils hoteliers da noss chantun (da san.).**

FOTOS G. N. STGIER

centuà il president dals hoteliers da noss chantun. Quella critica pauschala saja insumma betg giustifitgada. Ils giasts sajan fitg cuntents, sajan er pronts da pajar da-

ppli per products da qualitad e per in service gentil. «Noss problem è da preschent la valuta e nagin auter», manegia Ernst Wyrsch. El ha er cusseglià als hoteliers

grischuns da guardar plain speranza en l'avegnir. Da sbassar ils pretschs saja en nagin cas la schliaziun optimala cun avair malgrà la situaziun da la valuta medems

blers custs en mintga manaschi. Augmentar la qualitad e tgìrar anc dapli ils giasts, quai portia bler dapli. Impurtant saja er da persvader ils giasts svizzers da far er en l'avegnir lur vacanzas en Svizra, far bunas offertas e guardar bain da quels. Insumma far attent ils giasts a las acziuns spezialas, quai saja meglier che da sbassar ils pretschs, ha ditg Ernst Wyrsch.

## Daventar pli activs

Il president dal cussegl da turissem grischun, *Ernst Brugger*, ha ditg als hoteliers da daventar pli activs. Els duaivan vegnir pli inventivs ed innovativs, cunzunt quai che pertutgia il marketing. En cumparaziun cun autras destinaziuns turisticas na saja il Grischun en quella chaussa nagin bun exempel. La reclama saja memia pauc effizienta ed insumma hajan ils hoteliers grischuns tralascià da promover il turissem da stad. Tar quel saja avant maun in grond potenzial, ha manegià Ernst Brugger. Sa drizzà als hoteliers è lura er cusseglier guvernativ *Jon Domenic Parolini*. El ha ditg ch'il chantun vegnia segir betg a laschar en il steg il hoteliers e porscher maun per chattar bunas schliaziuns. Ils tractandums statutarics èn lura er anc stads en tavla ed ils delegads han reelegi Ernst Wyrsch sco president da Hotelleriesuisse Grischun e lura er ils 15 commembers da la suprastanza.